



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim




tir yimyim

TAPAK 7

Diya aser candle nung sen jenti
meindoktsüla: Akhilesh Yadav

Sorkari ni aputsü meranger:
KP Sharma Oli



VOL. XXIII ISSUE NO. 13 (ADOK 13) DIMAPUR TENTONÜ (MONDAY) MONGPUTENI (OCTOBER) 20, 2025

₹ 5.00

NPF CEC-i NDPP den ka akümtsü mulunger

Dimapur, October 19, 2025 (TYO): Naga People's Front (NPF) nung Central Executive Council (CEC) pur October 18, 2025 nü rongdak senden ka amendang Nationalist Democratic Progressive Party (NDPP)-i NPF den ka küma loktepba agizüktsü bangjemtepogo.

Central Office, Kohima nung CEC-i iba onük kanga junga jembiba sülen party constitution nung lateta aliba ama NDPP-i NPF den loktepba pusema nungittsü lemtet.

NDPP lenisübai tasü itta lemtet shitak agiba aser Chief Minister Dr. Neiphiu Rio-i ajaki haihaura asütsüsa len ania yariba

atema NPF CEC-i tenüngsang agütsüogo.

NPF-i mapang talangka nungi Indo-Naga yimten tebilemtsü latetstsü atema tenangzüka agir mapa inyaka arur ta CEC-isa ashi.

Iba senden nung Vice President Yangerlemba, General Secretary tem- Diethoselhou Sachü, Tseibou Khusoh, Manpha Konyak, aser H. Zungkum Chang nunger aden.

NPF aser NDPP ka küma loktepba ajanga Nagaland nung unified regional force ka kümnür. Iba ajanga sorkar ketdangsubaren nung yariteptsü aser Indo-Naga olemtep tatembang kati arunür.

JD(U) Nagaland-i NPF-NDPP loktepba pusemer

Dimapur, October 19, 2025 (TYO): Naga People's Front (NPF)-i Nationalist Democratic Progressive Party (NDPP) den ka küma loktepba pelashishia agizüker aser iba ajanga Nagaland yimtenren nung temelenshi tajung alitsü ta Janata Dal (United) (JD(U)) Nagaland Unit-i metetdaksü.

Iba ajanga Nagaland nung yimjung, terenlok aser sorkar ketdangsubaren nung amalitep adoktsü ta parnokki ashi.

"Party ana loktepba ya political alignment ka dang masü saka asenoki nungdakba külem alizüing indang kuli agütsür" ta MLA aser JD(U) Nagaland President Ar. Jwenga Seb-i ashi.

"Iba mera ajanga Jayaprakash Narayan ama namanirtem tushir, parnokki yimjung asoshi bendanga agütsüba ajanga Naga nunger aser India sorkar tsüingda

ceasefire tamendakdak yanglua yutsü" ta Seb-isa ashi.

"BJP den yaritepa NDPP aser NPF tashitem loktepba ajanga regional coalition tashitaitba kümogo aser iba ajanga Naga nunger yimten taginübatem asoshi mapa tulu inyaktetstsü. JD(U)-ia iba unified front pusema nungiter" ta paisa ashi.

Tuensang United Naga (TUN), Changlang Town Council (CTC), Eastern Naga Peoples Organisation (ENPO) aser tanga teloktem ka küma longjemtsü atema JD(U) Nagaland President-isa ayongzüko.

"Telongjemji asen tashi lir. NDPP, NPF, BJP, JD(U) aser tanga party tem külemi Nagaland taginübatem asangsang nung ataloktsü aser iba ajanga azükaru, putepshiba aser yimjung putu bener arutsü" ta Seb-isa ashi.

Arunachal nung Anti-Conversion Law mapa tenzüktsü akhanger

LISOPURTEMI MIZORAM ASER NAGALAND AMA MEKÜMDAKTSÜNÜR

Itanagar, October 19, 2025 (Agencies): Arunachal Pradesh nung lisopurtemi October 18, 2025 nü Itanagar nung peaceful rally ka nung shilem agiogo.

Parnoki Arunachal Pradesh Freedom of Religion Act (APFRA), 1978 mapa tenzüktsü atema takhangba agütsü.

APFRA ya küm 46 tain anti-conversion law ka lir saka iba ozüing yangluba sülen tulubalen mebenshii dang arur.

Iba sentong ya Indigenous Faith & Cultural Society of Arunachal Pradesh (IFCSAP) ajanga ayongzüker aser district 27, major tribes 26 aser sub-tribes 100 tema nungi teshimtet mübotem aden.

Iba sentong nung shilem agirtemi placards aben aser Arunachal Pradesh nung lisopur tamangtem kümzüka ayutsü takhangba agütsü.

Parnoki talisa Donyi-Polo

belief system kümzüka ayutsü ashi. "Donyi" ya anü aser "Polo" ya ita lir aser iba tamangba yimsü melenba ajanga iba tamang lendong nung lir ta lungkak aitertemi ashi.

"Sorkar dang APFRA mapa ajak inyakttsü ayongzüksü atema iba rally ayongzüker. Iba Act ya 1978 nung agizük aser iba ya State Assembly mezüngbuba session agir ita pezübuba nung lisopurtem atema yanglu, ajisüaka aiben mepishiaka iba Act ajunga mebenshir" ta IFCSAP President Dr. Emi Rumi-i ashi.

APFRA agizükba sülen presidential assent angu saka sorkartem melentepa arudang lisopurtem dang tebangi dang nangzüka aru. Iba Act ajunga küma inyakra Arunachal nung lisopurtem sobaliba, inyaksangshi aser külemküjaba kümzüka ayutsü ta Dr. Rumi-isa ashi.

(Maneni tapak 2 nung...)

Naga Tribe Hohos aser FNR senden amen



Naga Tribe Hohos (NTHs) aser Forum for Naga Reconciliation (FNR) külem senden amenba noksa angur

Dimapur, October 19, 2025 (TYO): Naga Tribe Hohos (NTHs) aser Forum for Naga Reconciliation (FNR) tsüingda temulung lemtepsa aser külem tebilemtsü khuret abenba tangatetba nung October 18, 2025 nü Hotel Japfu, Kohima nung senden ka menogo.

January 14 aser September 27, 2025 tashi nung NTHs, Naga Political Groups (NPGs) aser FNR tsüingda senden 16 amenba sülen yashi iba senden ayonga amen.

Naga nunger putiotsü agizüka aser longjemtsü nungdak ta asüba angateta Naga Political Group (NPG) shingaia iba nungdakba

mapa nungi balaka razüka maotsüla ta NTHs aser FNR-i metetdaksüogo.

NTHs, NPGs, mesüra FNR-i tang nungi Naga yimtenren telok tasen tentetba magizüktsü kechiyong telok balala razüka aoba ya putepshiba lenmang nungi pilaa aoba lir ta parnokisa ashi.

Naga Tribe Hoho-i pei pei kin nung telok tongtiba lir anungji forum mesüra body kechaia Tribe Hoho madak tashi mamshitsüla. Iba ajanga Hoho shia nem alemli nungi tashi agüja aliba tushir ta yashi senden nungsa bangjemtep.

Eastern Nagaland Peoples'

Organisation (ENPO) socio-economic-political azükarua alitsü taginübatem akhümtsübur aser Journey of Common Hope nung Naga kibong den yariteptsü mepishir ta NTHs aser FNR-i ayongzüko.

NTHs aser FNR ajanga NPGs dang mapang shia ajurutepe Naga temetenten lemsateptsü aser külem Machang anitettsü ayongzüko.

Senden nungsa November 30, 2025 Deobar anogo Advent Program ka ayonga agitsü senden nung bangjemtep. Iba atema FNR-i NTHs aser NPGs den asüingdangtepa sentong alidak aser sentong renemtsü.

NDPP ya 'regional political force' tulutiba lir: Chingwang Konyak

Kohima, October 19, 2025 (TYO): Nationalist Democratic Progressive Party (NDPP) President Chingwang Konyak-i 6 buba NDPP General Convention nung 2017 küm party tentetba nungi Nagaland nung regional political force tulutiba akümba indang jembi.

Iba anogo ya otsüsütsü anogo ka lir aser NDPP-i Naga People's Front (NPF) den ka küma lokteptsü lemtetba sentong nung region ajak nungi züngsemtemi adenba atema pelar ta Chingwang Konyak-i ashi.

"Kechisarena asoshi tsüingkhüm ka lir, aser anüing kübok mapa ajak asoshi pei mapang tataktet lir" ta Sayutsüingir 3:1 nung shia aliba ama tanü ya Nagaland nung regional politics atema tetenzük tasen ka lir ta paisa ashi.

2017 küm Nagaland nung state tia melentsü atema tashitait sorkar ka, lenisüba aser policy tajungtem nungdakba mapang ka regional political sabang tasen ka tentet May 17, 2017 nü Democratic Progressive Party (DPP) tenzük aser iba ya "Deeds, Not Words" tangatetba agi len ani. Kasa küm Election Commission of India-i ashiba angaa Nationalist Democratic Progressive Party (NDPP) ta

tenüing amshi, ta Chingwang-isa ashi.

2017 küm Niathu Resort, Chümoukedima nung mezüngbuba convention ayonga agiba sülen February 2025 nung pungububa convention tsüingda asenoki mapa aika inyaktetogo ta paisa ashi.

October 13, 2017 nü NDPP ya Election Commission of India nung officially register asü. Tesüba küm pungu tsüingda NDPP ya Nagaland nung regional political party tulutiba kümogo aser 2024 Lok Sabha elections dak alaka election ajak nung takok nguteta aru ta NDPP President-isa metetdaksü.

NDPP-i People's Democratic Alliance (PDA) kübok Bharatiya Janata Party (BJP) den tesentaktep akangshia aru aser 2018 nungi iba teloktep ajanga Nagaland nung yimsü süa arur. Chief Minister Dr. Neiphiu Rio lenisüba kübok 2023 Assembly elections nung NDPP-i menden 37 nung takok angu aser kümsük tanaben atema sorkar aküm, ta paisa ashi.

June 2024 nung Urban Local Body (ULB) elections mapang NDPP-i district 11 nung menden 152 nung takok angu aser iba nung menden 45 nungbo

tetoktepa maliasü ta Chingwang-isa ashi.

Tang tashi nung NDPP nung registered members 2,51,992 lir aser iba nung active members 83,591 aser primary members 1,68,401 lir ta paisa shisem.

NDPP Central Executive Board-i September 12, 2025 nung NPF bangzüng benoka lemsatep aser NDPP Constitution nung Article X nung lateta aliba ama General Convention ayonga lemtet ka agitsü bangjemtep.

Party ana loktepba ajanga regional tangatetba aliba lennirtem longjema aliba aser Naga nunger taginüba asoshi longjemtsü mapang atongba sayur. Iba mapa ajanga regional ola tuluba akümtsü aser Nagaland nung yimtenren akangshiba den tejakleni aotsü ta Chingwang-i ashi.

Chief Minister Dr. Neiphiu Rio lenisüba asoshi tenüngsang agütsür aser asenok ka küma loktepba ajanga telongjem aser terenlok putu ka ajurutsü. NDPP-i tamang, nükjidong aser Nagaland nung alirtem tenzüktsü tangatetba nung inyaka arur aser asenoki iba otsüsütsü mera agidang Naga tebilemtsü aser state tajungba kümdaktsütsü tenangzüka agishir, ta paisa metetdaksü.

Nagaland nung 'authorised notaries' teimba akümer

Dimapur, October 19, 2025 (Agencies): Department of Legal Affairs, Ministry of Law and Justice ajanga sangdong ka agütsüba sülen Nagaland nung authorised notaries anasü agi teimba akümtsü.

October 17, 2025 nü Notaries

(Amendment) Rules, 2025 ajanga Notaries Rules of 1956 yanglushir aser ajanga Nagaland, Gujarat, Tamil Nadu, aser Rajasthan densemna state aika nung notaries teimba akümer.

Nagaland nung maximum number of notaries ji 200 aliba

nungi 400 kümogo.

Item inyakyim dang Notaries (Amendment) Rules, 2025 ta ajatsü akok aser Official Gazette nung sangdongba anogo nungi mapa tenzüktsü ta Department of Legal Affairs, Ministry of Law and Justice-i metetdaksüogo.

Maruti Suzuki Arena Seyi Auto ajanga Kohima nung 'Victoris' saya



Kohima, Mongputeni/Oct. 19 (TYO): Maruti Suzuki Arena Seyie Auto ajanga October 18, 2025 nü Kohima showroom nung 'Victoris' gari tasenba sayaogo. Iba sentong nung akhumdong ama Director General of Police (DGP) Nagaland, Rupin Sharma, IPS dena liasü aser Seyi Auto indang Dealer Principal Kuolachalie Seyie dena liasü.

Sentong nung jembidang DGP Sharma-i dealership dang Nagaland nung automobile industry nung shilem agiba aser Maruti Suzuki indang network ajanga customer service tajung agütsüba atema

tenünsang agüja liasü.

Seyi Auto nung In-house Trainer, Joshua-i Victoris gari tasenba indang metetpelaba mapang iba gari design, advanced safety features aser India nung aliba lenmang asoshi yangluba performance capabilities indang rateta ashi.

Victoris ya mid-size SUV lir, aser premium features, multiple power-train options (mild-hybrid, strong-hybrid aser CNG densema) aser top-tier safety credentials bushiba talirtem asoshi lir.

Iba gari tema nung LED lighting, body lines aser silhouette lir aser telung cabin nung infotainment, lighting

aser connectivity aser safety features tem lir.

Victoris ya sen 10.49 lakh (ex-showroom) nungi tenzüker, koba 1.5L mild-hybrid (5-speed manual) variant alitsü aser tematiba ya sen 14.71 lakh (ex-showroom) tashi agi angutsü, koba strong-hybrid AWD models tem alitsü.

Iba sentong nung Thejoseto Medeo menden liasü aser Nagaland nung mezügbuba Victoris ya sentong akhumdong ajanga agüja liasü.

Iba sentong ya ajanga Seyi Auto asoshi ano alizüing tasen ka alitsü, koba region nung Maruti Suzuki dealers tejangja rongnung ka lir.

Manipur police-i KCP-PWG den sendaktepa aliba Meitei tsür ka apu

Imphal, Mongputeni/Oct. 19 (Agencies): Tetsür ketdangsürtem densema Manipur police aser central security forces lungjemer Meitei tsür ka apu, shiba underground Kangleipak Communist Party-People's War Group (KCP-PWG) den sendaktepa lir ta tai tonglokja lir.

Arishi küm 42 tain Meikam Basantarani Devi, shiba dang Abenao ta ajar, la ya Imphal

West district kübok Uripok Laikhurembi Leikai nungi lir aser tang Pishum Oinam Leikai nung telidak lir ta police ajanga ashi.

La ya Honibarnü Singjamei-PS kübok la atsükshia aliba tesem ka nungi apu.

Police ajanga ashiba agi, tetsürla ya tashiyim amshia senotsü meshiba maparen nunga dena lir aser loan recovery aser ali ken o tem

nung tetsüngtai ia aser nisungtem amokmeren mapa inyaka aru ta ashi.

La ket nungi tim masüba inyakyim indang documents kar, mobile phone ka aser Aadhaar card ngutet.

La ya Bharatiya Nyaya Sanhita (BNS) 2023 nung yanglushia aliba Unlawful Activities (Prevention) Act (UA(P)A) indang tapet ozüing kübok apu ta police ajanga ashi.

NIELIT Chuchuyimlang nung documentary ka sayu



Dimapur, Mongputeni/Oct. 19 (TYO): National Award anguba NFDC-produced film "Lentina Ao: A Light on the Eastern Horizon" indang special screening sentong ka October 18, 2025 nü NIELIT, Chuchuyimlang campus nung agia liasü.

Gandhian Social Worker tejangja nübu, Padmashree Lentina Ao nem akhum agüja iba sentong ya agongzüük, shibai Nagaland aser alema oa tesem balala nung nüburtem takum nung kongshitsüsa mapa tajung jenti inyaka aru.

La kinungbo Asür Padmashree Natwar Thakkar tena külemi 1955 küm Nagaland Gandhi Ashram amenok, koba

tanü tashi nüburtem maneni tenzüker.

Iba sentong ya tongtipang liasü, kechiyer ibai Lentina Ao küm 98 ajungba anogomung liasü.

Iba film ya Sanjib Parasar-i direct asü, aser iba category nung shilem agir 250 nungi 71st National Award for Best Biographical Film ngua liasü, koba India Tir Draupadi Murmu-i September 23, 2025 nü Vigyan Bhavan, New Delhi nung agüja liasü.

Iba documentary yagi Lentina Ao indang takum otsü ashir.

Iba sentong nung Chuchuyimlang yimtsüing nungi tantsü-tambo, NIELIT nung

azünger aser tesayur aser nüburtem dena liasü.

Sentong nung Dr. Aotoshi, Managing Trustee, Nagaland Gandhi Ashram ajanga iba film director Sanjib Parasar aser Executive Producer aser Co-Director Nilakshi Medhi nem tetushi agüja liasü.

Sanjib Parasar-i Lentina aser Chuchuyimlang nüburtem ajanga dang pelaba lemsatepa liasü.

Sentong nung menden Imlirenla Longkumer Senior Teaching Faculty liasü aser lai NIELIT, Chuchuyimlang ajanga cultural awareness aser art, film aser IT ajanga shisatsü lemsatepba indang lematepa liasü.

Nagaland Angh-i Diwali benjongsalem lemsatep

Dimapur, Mongputeni/Oct. 19 (TYO): Diwali benjong tenüing nung ajak dangi salem abener. Iba tesangwa benjong ajanga ajak dangi tesunep, yimchiyimjung aser tepela bener arutsütsü imlar, ta Nagaland Angh Ajay Kumar Bhalla-i sangdong ka nung ashi.

Tammang madak tesangwa agi takok anguba, temenen madak tajung agi takok anguba

asenoki benjongdang asenoki yimjung, temeim aser telungjem indang tanüla agizükti.

Diya indang tesangwa agi asen teimla aser shisatsü aliba lenmang sangwatsütsü aser iba benjong ajanga asenok tsüingta tashi aser telungjem akangshitsü imlaa atar.

Ajak dangi tepela Diwali benjong salem abener, ta Nagaland Angh ajangasa ashi.

NPF Traditional CEC senden ayonger

Dimapur, Mongputeni/Oct. 19 (TYO): Central Executive Council (CEC) züingsem ajunga, Divisional Representatives, President's Nominees, aser Party MLAs ajunga Traditional CEC Meeting nung adentsü ayongzüker, koba October 20, 2025 nikongdang 3:00 ako nungi NPF Central Office, near Hotel Japfü, Kohima nung amentsü, ta S. Akho Leyri,

Vice President (Adm), NPF Central Headquarters, Kohima sangdong ka ajanga ashi.

Iba senden ya kanga tongtipang lir, kong Chief Minister-i Leader of the NPF Legislature Party jenjang nung Traditional CEC Meeting nung tang mezügbuba jembitsü lir.

Züingsem ajunga dang iba tongtipang senden nung arua adentsü mepishir, ta sangdong ajangasa ashi.

Arunachal nung NSCN-K-i puraoer 2 kümzük

Itanagar, October 19, 2025 (Agencies): Arunachal Pradesh nung Assam Rifles Khonsa Battalion-i Longding Police den yaritepa NSCN-K (National Socialist Council of Nagaland - Khaplang) ajanga apuba aayanger ana kümzükogo.

October 18, 2025 nikongdang 4:00 ako meta Tirap district kübok Village Lahu nung telungpur 7-8 shi kati M/S Agarwal Construction Company asoshi mapa inyaker ana pur ao. Tena ya road-building project nung inyakertem lir.

Osang tejangja ka angazükba nung ajemdaker Khonsa Battalion-i Longding Police den

külemi joint rescue operation ka tenzüker. Parnoki General Area Ngisa K Nokna Track aser General Area Nginnu K Nokna Track nung telungpurtem sottsü aser parnoki pua aliba nisung ana kümzüksü sentong atong.

October 19 anepdang 5:50 ako meta telungpurtemi joint rescue team ka dak injang khaloktsü aser idangji parnokia meyiper khatep.

Telungpur aser sepaitem tsüingda khatepba sülen iba tesem mita aodang aayanger ana ngua kümzükogo.

Ketdangsürtemi ashiba agi telungpurtem aputsü atema operation maneni inyakdar.

Arunachal nung Anti-Conversion... (TAPAK 1 NUNGI...)

Taküm February 17 nung Arunachal Christian Forum (ACF) züingsemtemi Itanagar nung APFRA anema ghonda 8 lumia lungkak aita liasü.

Iba sentong nung MLA aika aden aser parnoki Khristantem dak tenük yoka sorkar iba ozüing beshitsü meranger ta tai tongloksü.

"Iba anti-conversion law ajanga tamangba agizüktsü nüjiso agiener. Onoki iba ozüing magizüker kechiyong iba ajanga Khristan yimsü dak tenük yoker. Nübertemi tamangba yimsü melentsü temeten alitsüla aser iba ama ozüing benokba ajanga tesempatep ang adoktsü" ta ACF President Tarh Miri-i ashi.

Ajisüaka, Arunachal sorkari iba Act ya mapa küma inyaksüla kechiyong Gauhati High Court-i tetuyuba ka agütsüogo ta ashir.

September 2024 nung GHC-i Arunachal Pradesh sorkar dang ita trok tsüingda APFRA indag draft rules renemtsü tetuyuba agütsü.

"Tamangba yimsü melenba ya menokdangra Arunachal ya Mizoram mesüra Nagaland ama akümtsü" ta advocate & keynote speaker S.D. Loda-i ashi.

"Onoki Mizoram mesüra Nagaland ama mekümnür, kechiyong item state nung nisung ajak tamangba yimsü melenogo aser foreign religious propaganda

ajanga lisopur tamangba yimsü aser maitsü samaogo" ta Loda-isa ashi.

"Iba Act ya tamangba yimsü anema masü saka lisopur tamangertem kümzüka ayutsü atema dang lir. APFRA ya lisopurtem mesüzüka tamangba yimsü memelendaktsü atema lir. Iba ya reshikangshitsü atema masü saka wazüka ayutsü atema lir" ta Professor Dr. Nani Bath-ia ashi.

1978 küm yangluba APFRA ajanga tashiyim, mesüzüka mesüra ashikülak mapatem ajanga tamangba yimsü melenba noktanger. Iba nung aibelenertem asoshi temerenshi lir aser tamangba yimsü melenba osang district ketdangsürtem nem sangoktsütsü lateta lir.

Iba ozüing ajanga Arunachal Pradesh nung lisopur tamangba yimsütem- Donyi-Poloism, Buddhism, aser Vaishnavism agizüker aser item mesükba tamangba yimsü inyaksangshi wazüka ayutsü lateta lir.

APFRA mapa tenzükttsü atema ola tuluba adokdang, Arunachal Pradesh nung tangatetba tulu ana ajanga telemsa adoka lir. Tangatetba kaji lisopur inyaksangshi ozüing ajanga kümzüka ayutsüba aser tanabubaji linük temzüing ajanga freedom of religion kümzüka ayutsüba lir.



October 19, 2025 nü New Delhi nung linük tatong Tir, C.P. Radhakrishnan-i taoba Tir, Ram Nath Kovind aser par kibong ajurudang tangokba noksa nung angur.

Bihar assembly election nung AIMIM-i menden 25 nung tokteptsü

New Delhi, October 19 (Agencies): Hyderabad nungi MP, Asaduddin Owaisi-i aniba AIMIM party-i taruba Bihar assembly election nung menden 25 nungi tokteptsü atema candidates tenüng sangdongogo. AIMIM-i Bihar nung opposition teloktep Mahagathbandan nung adentsü mepishia liasü saka magizükba sülen parnoki menden 100 nung tokteptsü, ta sangdong. Amongnü AIMIM-i sangdongba candidates 25 nungji Bihar unit Tir aser MLA, Akhtarul Iman densema lir. "Taruba Bihar assembly

election atema onoki AIMIM candidates sangdonger. Candidates ji AIMIM Bihar Unit-i party national lenirtem den jembitepa shim. Bihar nung sensakertem aser senzuka yutsübapurtem atema onoki ola adoktsü," ta AIMIM-i metetdaksü. Iman-i maneni Amour menden nungisa tokteptsü. Iba menden nung JD(U) nungi taoba mapang Rajya Sabha MP, Sabir Ali-i tokteptsü. AIMIM-i talisa Seemanchal region nung aliba mendentem nung tokteptsü. Iba region ya tzümetsüng kanga bulua atalokba aser Muslim nunger nütsüng aika aliba region lir.

AIMIM nungi Manoj Kumar Das-i Gaya kübok Sikandra menden nungi tokteptsü aser East Champaran kübok Dhaka menden nung Rana Ranjeet Singh-i tokteptsü. Taoba Bihar assembly elections nung AIMIM-i menden 19 nungi toktep aser menden pongu nung takok ngua liasü. Ajisüaka AIMIM MLA pezüi party toktsür RJD nung adenba agi assembly nung party MLA Iman dang anüng. AIMIM-i shidi ajanga RJD Tir Lalu Prasad aser par jabaso Tejashwi Yadav na dang opposition teloktep nung adentsü asüngdanga liasü, ajisüaka telangzüba mangu.

JNU kaketshirtemi longkak aitba mapang police den rara

New Delhi, Mongputeni/October 19 (Agencies): Jawaharlal Nehru University (JNU) nung Left den affiliate süa aliba kaketshir teloktem nungi züngsemtemi Akhil Bharatiya Vidyarthi Parishad (ABVP) anema ken o benoktsüla, ta takhangba agüja longkak aita jajaba mapang nung police den rara adok; iba tatalokba sülen kaketshir 28 apu. Honibar aonung JNU West Gate nung longkak aitba mapang nung longkak aiterem aser police tsüngda rara adok aser iba tatalokba nung police trok yiru. Delhi police-i JNUSU Tir Nitish Kumar, tatong Tir

Manisha aser General Secretary Munteha Fatima nunger densema kaketshir 28 apu saka tesülen chiokogo. Osang angazükba agi, JNUSU election atema School of Social Sciences general body senden aliba mapang nung Left teloktemi, ABVP züngsemtemi tetsürtem densema kaketshirtem dak teka sangshi, ta tai tongloksü. Ajisüaka police-i parnok anema kecha meinyakba agi Honibar aonung 6:00 ako meta kaketshir 70-80 shi Vasant Kunj police station-i longkak aita aoba mapang nung Nelson Mandela Marg nung police-i parnok nokdanga liasü.

All India Students' Association (AISA) aser Students' Federation of India (SFI)-i, police-i tetsürtem dak-a kongshi, JNUSU lenirtem dak azük aser councillor ka mejungi yirua hospital-i anir ao, ta metetdaksü. Ano külen osangbenertem den jembidang Delhi Police Deputy Commissioner, Amit Goel-ibo police-i tashiyim mamshi, ta metetdaksü. Goel-i, "Police-i mepishibaji kaketshirtemi manga, o tamajung jembia, gari senzüsembongba nokdang aser police dak teka sangshi, ibayongji tensa azüoktsü atema police-i longkak aitertemji apu," ta metetdaksü.



October 19, 2025 nü Jammu & Kashmir Lt. Governor, Manoj Sinha-i Russia kübok Elista nung aliba Kalmyk Museum semdangdang tangokba noksa nung angur. Sinha-i International Buddhist Confederation (IBC) aser National Museum of India nungi nüngo oset kar Kalmyk Museum nem agütsüogo.

Ladakh nungi lenirtemi home ministry sub-committee ajurutsü

New Delhi, October 19 (Agencies): Ministry of Home Affairs (MHA)-i jaokba ama Ladakh nungi lenirtemi October 22 nü Delhi nung MHA sub-committee den senden amentsü, ta Amongnü Leh Apex Body co-chairman, Chering Dorje Lakruk-i metetdaksü. Leh nung osangbenertem den jembidang Lakruk-i, "Home Ministry-i sub-committee sendenji October 22 nü amentsü aser iba senden nung adentsü atema LAB aser KDA naprong jaoker, ta onok nem metetdakja liasü. Sorkari onok jaokbaji onoki pelaa agizükur aser iba senden nung telemtetba tajung agitsü imlar," ta metetdaksü. Leh Apex Body (LAB) aser Kargil Democratic Alliance (KDA) nungi züngsem asemsem aser Ladakh MP, Mohd Haneefa Jan nungeri sub-committee den senden amendang state jenjang aser Sixth Schedule kübok züngoktsü atema mepishitsü, ta Lakruk-i metetdaksü. Lakruk-isa, taoba mapang MP, Thupstan Chewang leniba nung LAB züngsemtem aser co-chairmen Qamar Ali Akhoo aser Asgar Ali Karbalai na leniba nung KAB züngsemtemi

sub-committee-i ayongzükb senden nungji shilem agitsü, ta metetdaksü. September 29 nü LAB-i, parnokibo October 6 nü MHA high-powered committee-i ayongzükb senden nungji shilem magitsü, ta metetdakja liasü. Ladakh nung nüburtemi state jenjang akhangba dak sendakba nung ken o jembitsü asoshi ita pezü tashi atsülanga aruba sülen Centre sorkari September 20 nü LAB aser KDA jaoka liasü. Sorkar aser Ladakh nung lenirtem tesüsabuba senden amenbaji May ita nung liasü. September 24 nü Leh nung longkak aitba mapang nung longkak aiterem aser sepaitem tsüngda rara adoka nisung pezü asü aser aika yirua liasü. Longkak aiteremi koijen aser gari kar rongdoktsüba dak sendakba nung police-i nisung 70 dak tali apu aser activist Sonam Wangchuk-a NSA kübok apu. Hokolbarnü Centre sorkari, September 24 nü rara adokba tatalokbaji retired Supreme Court judge ka leniba nung bushisüngdangtsü, ta metetdakja liasü.



October 19, 2025 nü Lucknow nung Bahujan Samaj Party (BSP) Tir, Mayawati-i party nung lenirtem den senden amendang tangokba noksa nung angur.

Diya aser candle nung sen jenti meindoktsüla: Akhilesh Yadav

New Delhi, October 19 (Agencies): Samajwadi Party Tir, Akhilesh Yadav-i, sorkari Diwali benjung nung sen kanga meindoktsüla saka Khristantemi Khristmas benjung amongdang inyakba ama inyaktsüla, ta jembiba nungi mangatetep adok. Sentong ka nung jembidang Akhilesh-i, "Ram tsüngrem tenüng nung ni tebilemba ka lemsatepdi. Khristmas mapang nung alima tesem ajaklen light agi yimitem sangwatsür aser ita songtema sangwatsür. Asenoki parnok (Khristantem) dang nungi angazüktsüla. Kechiba asenoki milen aser candle nung sen jenti indoktsü?" ta metetdakja liasü. Paisa, "Asenoki iba sorkar dang nungi kechi imlatsü? Iba sorkar ya agientsüla. Light

tesangwa tajungba asütsü atema onoki inyaktsü," ta ashi. Uttar Pradesh kübok Ayodhya yimti nung Diwali benjung mapang nung diya lakh 26 dak tali tsüklokba ajanga otsü tasen ka yanglutsü tebilemba lir, aser iba dak sendakba nung MP, Akhilesh Yadv-i iba o ya jembia liasü. Yadav-i jembiba oji aija BJP National otongdar, Shehzad Poonawalla-i, "Uttar Pradesh nung Samajwadi Party yimsüsüba kübok Ayodhya ya tamang nung yutsü. Taoba mapang Samajwadi Party sorkari Ram külemertem dak injang khalokja liasü. Tang Ayodhya wangshiba mapang nung Akhilesh Yadav-i ibaji maginer," ta metetdaksü. (Maneni tapak 8 nung...)



TIR YIMYIM YIMOBILEM (EDITRIAL)

DIMAPUR MONDAY, OCTOBER (MONGPUTENI) 20, 2025

Lanurtem atema mapa !

A tangji, asen lima nung mapa maka masü mapa inyaker meinyakma lir, ibayongji South India nungi dena arua amtsük yanglua ayoker, Rajasthan aser Bihar nungi arua asen taküm nüngdak ajak teyanglua yanglur aser bener-a arua ayoker aser Assam nungi dang masü saka memeteti aser meteta Bangladesh nungi dena nübo dang nübo maja arua asen alu aser kiojen yangluba mapatem inyaktsür. Ano, parnok jagi inyaker meinyakmaba mapa aika lir, iba jagi kidang light wiring aser pipeline mejungi akümdang aser kidang electronics osettem raksadang, itemji yanglushitsü nisung bushiaka mangur, anungji angati inyakdaktsütsü amai item mapa meteta alir tsümartem mesüzüka anir arua yangludaktsür aser parnok sen kwi meshidir pelashishia agütsür. Aji oda, tangarbo bendanglen nungi Nagaland-i mapa bushia arur saka asenok Naga nunger lanurtembo mapa mangu kidang mobile amshia amongba tebilemtsü tulu lir. Iba tebilemtsüji odang mangu amai toktsütsüla masü aser lanurtemji aija menütsüba agia parnok taküm tia tamajungba dang kumadoktsü, anungji parnok tebilemtsüji asenok ajak arok tebilemtsü kümer akoktsü merangtsüla, kechiyong parnokji alima nung ozüng raksartem kumadokra, asenoki aginüyonga maginüyonga asenok ajak arok meyong tebilemtsü kumadoktsü. Tanü asen lima nung lanurtem mapa manguba tensa tia asadangtsübaji, tang Nagaland Police nung constable mapa 1176 atema nisung 15,252-i tenüng agüja aliba mapa ya asütsü. Ano, kasa mapa nung aitsü jangrartem atema tenüng agütsütsüba anogo November 7, 2025 tashi agüja lir, anungji ano taruba anogo 17 tsüngda nung nisung kwikati tenüng agütsütsüar shingaia meteta mali. Ajisüaka, tang tenüng agüja aliba apibo, ashiko, nisung meyirijang metsübo ajungtsüsa Nagaland police 1176 shimtsüba mapa atema tenüng agütsütsüa akok. Aji oda, tang tashi nung nisung 15,252 rongnungia nisung 1176 shimerbo nisung 14,076 bo mapa mangutsü. Aji kodang bilemdangdir, asenok asoshi tebilemtsüji mapai aitsü merangdang meitetba nisung 14,076 nem mapa agütsütsüba asütsü. Item nemji government-ia mapa magütsütettsü, kechiyong government-i magütsütetba agidang parnok mapa mengui lir aser arogo dak imlatsüa mali, kechiyong arogoji mapa agütsüba telok ka masü. Anungji, iba khuret madakji asenok tsürabur aser taintemi kibur akümtsüla. Tetezü, lanurtem mapa manguba tebilemtsüji asen meyong aser asen tebilemtsü akümtsüla, kechiyong ibaji government-ia masü aser tangar shiangaia masü saka asenok tsürabur aser taintemi asen chirnur aser lanurtem dang mapa inyaktsü mesayutetba ajanga lir. Ajisüaka, asenoki tangatetba tajung kati arur tebilemtsü akoktsü merangtsübaji, asen tanur aser lanurtem dang mapa inyak sayutsübaji kodanga temenu maka, anungji tanga asenoki parnok dang mapa inyak sayutsüla. Atangji, asenoki parnok dang mapa inyak sayutsübaji aseni inyakba mapatem nung külem-külemi inyakbasa tajungba, ajisüaka asenoki yamaji meinyaktettsüa akok aser asenoki inyakba mapatemji parnok mejangratsü akok. Anungji, aji meteta asenoki parnok dang tanü putu nung inyakba nüngdak mapatem lenmang yangludang amshiba machine-tem nungi shir computer aser electronic dak sentakba mapatem aser chiyongtsü züsenteta chiyongtsü tapu balala yangluba mapatem angazükdaktsütsüsa parnok yoktsü mesüra tesayurtem anir arua sayudaktsütsü sentongtem yanglutsütsüla. Aji atema, asenoki shinga danga meimlai asenoksasa rateta shirnok bushia shirnok ajanga inyaktsü, aji bushitettsüla. Idangjibo, asen lanurtemi govt mapa tilateri kati ir tebok masüng alitsü agibo, peisasa pei angazükba mapa inyaka ali tajungba ta angatettsü.

OLEMSABANG

TANÜ AROGO ASER ALIMA

~ Rev. Dr. N. Moa Imsong, Counsellor

(Iba ya DABA Tongtepratep Adok 156, January - July 2024 nung adokba ocet tazüngertem ajangzükdaktsütsü bilema adoktsür).

(Yashi adok nungi...)

8. **Arogoji, Konang Nungsang Aser Nungtoko Akümtsü Bushitepba Jakla Dangi Meyiptsü.** Arogo nung tanelar mapa renlokba aser aküm tsübutep samaba sang nung aika abutsü. Alimar yimya ama, Arogo nung tashi (power) bushitepba, luxury süa linüba aser nungtoko leman bushiteptsü. Rom 12:1-2.
9. **Arogo Nung Lenirtemi Ya Mamatoktsüla, Tema Nung Sentsüperanga (Outward Appearance) Sayutsü Merangba Nungi Pilatsüla.** Showmanship nung tamakok lir ta mamatoktsüla. Tanü Arogo nung nisungtem tesentaktep nung aya wara laoktsü kikümtsüngdang nokdaka lir. Tsüngrem den sentakteper aotsü jangraba maliba linir arutsü wara atepi aita lir. Arogo nunger tanela tzü jemaka tzüra matemtsüba wara jaoktsü asen amung nokdaka lir. Arogo nungerji Tsüngrem nungi yokba aser temulungjang nung kongshitsüsa ochi aser tanela revival asoshi tzürrar, saka Arogo nung iba ama revival marudaktsütsü mojingi leman nokdangtsü asameyanger. Tsüngremi Arogoji arogopurtem nem tanela Temeshii platform lapoktsütsü yutsü ta mamatsüla. Tsüngremi Arogoji tanela agi asüngba arogopurtem aika kümtaktsütetsü yutsü ta mamatsüla. Iba ya meinyaktet tashi; Arogo nung Kotak otsü jembibaji kodanga mataloktsü o jembir asütsü.
10. **Arogoji, Akok Tashi Tanelar Luyimba Mapa Nung Mazüngi Inyaker Ka Asütsüla.** Arogoi mapa inyakba ajakji tanela sama aliba anir aruba mapa nung rangloker inyaktsüla. Iba mangdang nung Arogoi mapaji meinyakra Arogoji asütsü. Arogo jagi Arogo nungerji tanelar mapa inyaktsü asoshi shisatsü agütsüa sayutsüla, aser ajongmesoja inyaktaktsütsüla. Efesa 4:11-12. Arogo nung tanela agi asüngba nisungtem züintsü asoshi Arogo nunger shiaji tejanga Tsüngrem kulisür kaka küma yanglutsütsüla, T. Mapa 1:8.
11. **Arogoi Reshikangshi aser Tanela Samatsüba Timtem Ajurutsü.** Arogo nung kodang tekangshi ajurudir idangji dang Arogo tanela nung ainba aser Arogo züina aoba Arogo otsü nungji angur. Mt. 24:21, nung shia aliba ya arudagi asenok Arogo nungertem renema lir na? Tangar lima ajuruba ama asen tanela remseptsütsü tsükchirtemji, sung-long, perangpong injang aser nok-nü amer asen Naga nunger dangi arutsü amai bilemer asü? Masü! Asen Aor dangibo sen talep amer dang arutsü. SUV kari bener dang arutsü, ali aser ki agiang ta dang arutsü. Government mapa agiang ta dang arutsü, Free education agiang ta dang arutsü. Asenok Tsüngrem O nung tera yangloka lir na? Asenok Tsüngremer ochi O azüiter nokdaka lir na?
12. **Alima Mapa Aser Arogo Mapa Bendangtsü Mapang Arutsü.** (Malaki 3:18). 2 Korint 6:14-15, Mamangertem den mesütepi süngra külemi taputep. Kechiyong temenen den Temeshiba kechi nung putep? ... Mojing den Khrista kechi telungjem ali? Mesüra mamanger den tamanger kechi shilem aka? Shitak aser meshidak leman metetsü Tsüngrem dang shisatsü meshia Arogo nung lenir shia alitsü mapang tongja tongogo. Tamanger shia nai amangba Tsüngremji shiba kanga junga meteta amangtsü mapangi asen nem bener arutsüogo. Tsüngremi iba oset azünger maojangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM, MAOT aser Ao Senden tasembenbuba senden amen



October 16, 2025 nü ABAM, Mokokchung Aor Officers' Telungjem (MAOT) aser Ao Senden tasembenbuba ajurutepba senden nung tangokba noksa nung angur.

Impur, Mongputeni/ October 19 (TYO): ABAM, Mokokchung Aor Officers' Telungjem (MAOT) aser Ao Senden tasembenbuba ajurutepba senden Mongputeni 16, 2025 anogo nung nukla tulu anguba senden ka temoatsü nung agiogo, ta Amongnü ABAM Executive Secretary, Rev. Temsü Jamir-i sangdong ka ajanga metetdaksü.

Asen Aor lokti aser ABAM terenlok aser terenemjem süa otettsü asoshi tongtibang onük asem jembia aruya aliba

ABAM Sanen Luden senden nung benoka jembitsü asoshi tebilemdangba bener aotsü lemsatepa liasü.

Mezüngbuba nung, tanü asen Aortem nütsüng ajema akümba asoshi kuli tejangja ngutettsü nukla nung tapet tasüngdangba yanglua ano lenmang kobai aotsü, item lenmang bushia inyakba osang abentsü. Tanabuba nung, Impur Christian Hospital (ICH) tajungba nung asentenshia aotsü asoshi CBCNEI dang nungi kibur shilem meshia ano

nüngdakbatem ngutettsü asoshi lenmang balala anebalutsü, aser tasembuba nung Impur nung aliba "Museum" ya ajak asoshi "Tangazükdak Tesem" ka yanglua, talisa tarutsü putu asoshi nüngdakbatem talangi moi angutsü asoshi nüngdakba mapatem lokti balala den inyaka aotsü.

Tsüngremi item tebilembatem inyaka aodang tetsükdaksü kecha makai inyaka otettsü lenmang lapokjang ta sarasadema atar.

AICU-i anti-conversion ozüng anema PM Modi dangi shidi zülü

October 19, 2025: 1978 küm Arunachal Pradesh nung agizükba anti conversion ozüng-Arunachal Pradesh Freedom of Religion Act (APFRA) asentenshir benoktsü atema inyaksangshiba anema taoba hopta All-India Catholic Union (AICU)-i Ato kilonser, Narendra Modi dangi shidi ka zülü, ta International Christian Concern-i metetdaksü.

AICU-i, "APFRA tanaben asentenshir benokba ya linük temzüng kübok tamangba yimsü temeden anema amokmeren ka lir. Anungji yimjung aser tesünep alitsü atema tangsa iba Act ya agientsüla," ta temepishiba agütsü.

Court kati ita trok tsüngda iba Act benoktsü atema tuyuba sülen taküm March ita nung Arunachal Pradesh state sorkari APFRA tanaben reprangshitsü telemtetba agia liasü.

Küm 46 tashi iba ozüng

mebenoker, anungji iba ozüng ya benoktsüla, ta 2022 küm Gauhati High Court nem temepishiba ka agütsüba sülen yaküm September ita nung court-i ita trok tsüngda iba ozüng benoktsü tetuyuba agüja liasü.

Arunachal Pradesh Chief Minister, Pema Khandu-i iba ozüng tanaben benoktsü sangdongba sülen Khristan teloktemi iba ozüng anema longkak aita liasü.

Arunachal Pradesh nung Khristan nütsüng kanga renlokogo; 1971 küm state nung nütsüng shilem 0.79 dang Khristanem liasü saka 2011 küm tashi nungbo iba state nung Khristan nütsüng shilem 30 dak tali aküm. Iba ama Khristan nütsüng arenba agi anti-conversion ozüng benoktsü atema telemtetba agi.

AICU-i, tanaben asentenshir iba Act benokba ajanga tang state nung yimjung aser tesünep aliba ya

raksatsütsü, ta metetdaksü.

"Tamangba yimsü melenshiba mita reprangtsü atema state nem tashi agütsüba ya nija temeden anema lir, aser iba ya India temzüng kübok Arrla 21 nung agüja aliba yimsü temeden anema lir," ta AICU-i metetdaksü.

AICU-i, "Arunachal Pradesh ya nisung ajak tesünep nung litetba tatishitsü state ka lir. Iba state nung nisung tapu balala aika liaka kodanga kin mesüra yimsü nung ajemdaker rara madok. Iba Act asentenshir benokba ajanga iba temeden raksatsütsü aser linük temzüng tanela raksatsütsü," ta metetdaksü.

AICU-isa temepishiba shidi ajanga, "Chief Minister balalai yimsüsüba kübok Arunachal Pradesh nung iba Act ajanga teraksatsübatem metetogo, ibayongji tesüiba küm 48 tashi iba ozüng mebenok," ta metetdaksü.



Old Showuba Ao Baptist Arogo nung October 18 nungi 19, 2025 tashi ABAM WM kübok Sisterly Ministry ajanga 'Asen atepzüng tipdemdi' omen aser nukjidong yur lai o tapet agüja tangazükba tajung agütsüba sentong ka agiogo. Iba sentong ya Alempang Baptist Arogoi senotsü teyari ajak agüja agia liasü. Iba sentong nung tongti o jembir Rev. Watimenla, APW den tenzükla aseme yaritepa takok ngua agiogo. Iba ama nübo, rongsen aser shisatsü ajak agi nübortem tajung kümdakja yaritepba asoshi ABAM WM aser Alempang Baptist Arogo dang kanga pelar, ta sangdong ka ajanga OSABA nung sannüker M.Yanger Ozüküm aser APW Arenla Wati nati metetdaksüogo. (Iba sentong nung shilem agirtem noksa nung angur).

ANOGO ABEN TSÜNGREM DEN

Tsüngremi menütsür

Pa kotak nung shiba amener pai menütsür... (T.Ken 2:4).

Kechi agi Kibuba peladaktur ? Tenüngsang Ken 2 nung shia aliba amaji anidaktura telangzütsüji temela. Ibai tepela agi menüba masü. Asen temenen aser tamachi süa alibaji Tsüngrem tsüngdang temenünütsü masü. Aseni tamachi mapa inyakba ngur Tsüngremi menütsür. Tsüngremi menütsübaji kanga tesashi lir.

"Asen taküm lenmang nung meraji yakta dang tatembang kati arur. Anungji anogoshia mapa nung kümdanga alibaji shisa taka mapa lir. Tsüngremi asenok repranga alir. Anungji asenoki kechi jembir aser inyaker ajakji Tsüngrem akhüm tsübuttsü aser sentsüwangshi asoshi inyaker. Idangji saak-a tepela nung menütsü.

Tang nai kechi inyaker aji tarutsü asoshi ta nai amanger asü? Alima nung shishilembaba ama kotak nunga inyaker ta nai bilemer asü? Shisadangang...

School tanur meyrjang aikati Kibubai sayuba sarasadem agi

October 19, 2025: Tawa England nung school 250 nungi tanurtemi Kibubai sayuba sarasadem külemi agiogo.

Church of England (CoFE) indang Faith in North project mapatong kübok iba sentong ya ayongzüka agi.

Arogo tasen tenzüksüba, Arogo yangerba aser asentenshitsüba project kübok northern England nung Faith in North-i Arogotem aser school tem nem angati resource balala agütsür, aser item resource nungji Kibubai sayuba sarasadem, temeshi aini aoba, senmang aser baptiba onüktem densema lir.

Faith in the North Program Manager, Theo Sheridan-Watts-i, "Class takdang aser hall aika nung tanurtem aser lanurtemi longjemer Yisu Khristai asenok dang sayuba sarasadem külemi agiba meteta kanga pelar. Kibubai sayuba sarasadem ajanga asenok Tsüngrem den sendakteper, asenok tsüngda sendakteper aser iba lima nung tamang otsü sangdonger," ta metetdaksü.

"Iba sentong takok anguba atema ni schools aser tesayurtem dang pelar aser iba ya ajanga sarasademsü aser Yisui sayuba beshitsü atema tanurtem ajungmesotsü," ta pai ashi.

China nung Arogo lenirtem aika apuba atema USCIRF-i CCP aitsür

October 19, 2025: China tesem ajaklen Arogo lenirtem apuba atema United States Commission on International Religious Freedom (USCIRF)-i Chinese Communist Party (CCP) sashia aitsüogo, ta International Christian Concern-i metetdaksü.

October 10 nüa China nung ketdangsertemi Pastor Mingri Jin densema Zion Arogo nung lenirtem aser züngsem 30 dak tali apu; iba Arogo ya China nung underground Arogo tulutibatem rongnung ka lir.

USCIRF Chair, Vicky Hartzler-i sangdong ka ajanga, "Khristan lenirtem apuba ajanga CCP-i maneni yimsü temeden anema inyakba kuli sayuogo. Onoki US sorkar dang Ezra Jin densema pua alirtem ajak chiochtsü asoshi China rongshitsü mepishir," ta metetdaksü.

China Tir, Xi Jinping lenisüba kübok CCP-i Sinicization of Religion policy benoker.

China nung CCP tangatetba anema inyakba yimsü teloktembo ozüng alema inyaktertem ama züngshia apur

aser reshikangshir.

CCP aija USCIRF Vice Chair Asif Mahmood-ia, "Tang tesüsa yimsü lenirtem aika apuba ya CCP-i maneni pei sensotem anema inyakba lir. Yimsü temeden nokdangtsü atema China sorkari ajak inyachtsü," ta metetdaksü.

Taoba mapang US tatong Tir, Mike Pence-ia, "Chinese Communist Party-i Pastor Ezra Jin Mingri aser Khristan lenirtem tangsa chiochtsüla. Khristan yimsü anema inyakba ya magizüktettsüla," ta ashi.

Paisa Mathi 5:10 nung aliba Lai O lemsatepa, "Temeshiba inyakba asoshi shirnoki reshikangshi ajangshir, parnok temoatsüba; kechiyong Kotak yimli parnok meyong," ta metetdaksü.

2025 Annual Report nung USCIRF-i U.S. Department of State dang China ya maneni Country of Particular Concern (CPC) nung züngoktsüla, kechiyong parnoki asalentong yanglur maneni yimsü temeden anema inyaker, ta metetdakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tokshionshi**

(v) mapayui mashimashi amshiba (use lavishly)

* Benjong nung tokshionshi kanga alir.

Tokshitoklem

(adv) chiyongtsü entokenra (waste food)

* Ki aika nung tokshitoklem chidaktsütsü ak metsür.



Tir Yimyim

OLONG PAITEP # 7305

1		2				3		4		5
				6						
	7		8							
9					10			11	12	
			13			14	15			
16						17		18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatapba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. tatsü - (3)
12. Tebur kidong aser zünga kasa tsüingda jatapba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7304 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüingdak,
10. Yongya, 11. Kongro, 13. Ora,
14. Ata.

NAI-A YA METETTER

Indian athlete & adventurer with a cause Mann Sharma-i alima nung mezüingbuba Burpee Marathon tembangba ajanga alima otsü tasen ka yangluogo. Jawaharlal Nehru (JLN) Stadium nung Mann Sharma-i anogo 9 agia 'broad burpees' ajanga dang kilometer 42.195 tashi tembangba jajaogo. Iba otsü tasen ya World Book of Records, London nung züluokogo aser parnok ketdangsürtemi Mann nem world record certificate aser medal agütsü.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Manipur nung brown sugar shibelener nisung 8 apu**Imphal, October 19, 2025**

(Agencies): Manipur nung sepaitemi sapon pongdang 225 nung Brown Sugar seret 9.8 shi bena aliba apu. Iba ya international market nung Rs 10 crore shi alang asütsü.

Osang tejangja ka angazükba nung ajemdaker Manipur police nung Anti-Narcotics Cell (ANC) aser Kangpokpi district nung Alex Farm nung mapa lemozüka aliba central paramilitary personnel-i mita aodang Brown Sugar apu.

Iba dak sendakba nung parnoki Maruti Alto gari ka, Diesel Auto ka aser mobile phone 4 apu.

Brown sugar abenba atema Veineichong Lhungdim, Thongkhopao Lhungdim aser

Thangminlun Haokip nungertem apu aser parnok ajak ya Kangpokpi district nung alir.

Par asemprong ya Kuki nung aser Narcotic Drugs and Psychotropic Substances (NDPS) Act kübok ken o benokogo.

Maneni, sepaitemi Mao jila nung drug shibelener nisung 5 den brown sugar gram 600 shi puogo.

Senapati Police aser 16 AR sepaitemi mita aodang sapon pongdang 15 nung brown sugar gram 192 bena aliba apu. Iba dak sendakba nung parnoki Bishal Kumar (23) apu. Pa ya Senapati District kübok Lairouching Village nung alir.

Bishal Kumar-i Tata truck (6-wheeler) AS-01-DD-4094

ka nung brown sugar shibelendang apu.

Iba dak sendakba nung bushisingdanga aodang nisung ana apu. Tenaji Lungsuipii Ranmei (30) aser Luikang Adam (28) na ta jangjaogo aser tenaprong Kangpokpi District nungi lir.

Senapati Police aser 16 AR sepaitemisa Mao Police Station (PS) Check Gate nung mita aodang nisung ana ket nung brown sugar gram 407 bena aliba apu.

Tena ya H. Linii (35) aser V. Mado (36) na ta jangjaogo aser tenaprong Senapati district nungi lir.

Tenati Tata Yodha gari (NL-07-AA-3011) ajanga brown sugar shibelen aser Mao PS nung ken o ka benokogo.

Mizoram nung 'Thenzawl Peace City' yanglutsü: CM Lalduhoma**Guwahati, October 19, 2025**

(Agencies): Mizoram sorkari Serchhip district nung Thenzawl jila ya "Thenzawl Peace City" ama renloktsü osang metetdaksüogo.

Iba ya tourism ajungkettsü aser local development yaritsü nükjidong nung lir.

Chief Minister Lalduhoma-i Hokolbarnü iba mapatong atema consultancy firm ka den master plan renemtsü atema senden menogo ta Chief Minister's Office (CMO)-i metetdaksü.

Thenzawl Peace City ya Mizoram nung mezüingbuba planned city lir ta CM Lalduhoma-i ashi.

Iba mapatong nung State Project Monitoring Committee-i ketdangsüa mapa inyaksü. Senden nung consultancy firm-i India aser tangalen parnoki ibala mesükba mapatongtem



inyakba osang lemsatep aser Thenzawl Peace City renlokdaaktsütsü atema tebilembatem metetdaksü.

Senden nung Home, Urban Development, & Poverty Alleviation Minister K. Sapdanga aden.

Mizoram sorkari state yimtiba Aizawl nungi Thenzawl-i melennür ta osang kar adokba ya Centre-i state sorkar dangi züluba shidi nung "clerical error" ka ajanga liasü ta sorkari ashi.

Thenzawl ya Aizawl nungi kilometer 93 pilar lir aser Serchhip constituency nung shilem ka lir. Chief Minister Lalduhoma-i 2018 aser 2023 Assembly elections nung iba constituency nungi toktepa liasü.

Chief Minister-i state yimtiba Thenzawl-i belennür aser iba atema centre dang nungi senotsü meshir ta taoba mapang opposition party Mizo National Front (MNF)-i tai tonglokja liasü.

Guwahati nung Rs 83 crore GST magütsüba atema nisung 1 apu**Guwahati, October 19, 2025**

(Agencies): Directorate General of GST Intelligence (DGGI), Guwahati Zonal Unit-i Rs 83-crore ka putetogo.

Iba mapa nung shishilembar Mukesh Agarwal (46) dena lir aser pa ya M/s Balaji Concast aser M/s Balaji Steel Rolling Mills atema tongti nübo ka lir.

Agarwal-i GST invoices medeni MS Ingots aser TMT Bars yanglua ayok aser iba ajanga Rs 83 crore tax magütsü

ta osang angazükter.

Iba ya Central Goods and Services Tax (CGST) Act, 2017 nung Section 16 alema inyakba mapa ka lir.

Directorate General of GST Intelligence (DGGI)-i bushisingdang aruba sülen Agarwal apu aser departmental custody nung lir. Okadaki pa indang bail plea aiben magizük aser anogo 14 nü judicial custody-i yok.

Ozüng alema tajangzük

agütsü mechi GST framework alema inyakertem asoshi iba ya tekümdangtsü osang ka lir. Iba ashikülak mapa nung shilem agirtem jangjatsü aser magütsü aliba tax angutsü atema maneni bushisingdang südar ta DGGI ketdangsür kati ashi.

DGGI-isa tax fraud atema zero-tolerance policy aliba osang nenshiogo aser GST evasion atema ozüing tesashitaba agi merenshitsü ta parnokisa ashi.

Mizoram nung January nungi nisung 121 TB ajanga asü**Aizawl, October 19, 2025**

(Agencies): Mizoram nung taküm January ita nungi tenzüker nisung 121 tashi tuberculosis (TB) ajanga süogo ta state health department-i metetdaksü.

Taküm January 1 aser October 10 tsüingda nisung 1,870 dak TB puteta liasü ta parnokisa ashi.

Iba mapang tsüingda blood samples 97,647 tashi tendanga liasü ta Public Health and Family Welfare Department-i

metetdaksü.

Diagnosed cases 1,870 nungi nisung 744 dak tuberculosis putet aser nisung 121 dak multidrug-resistant TB (MDR-TB) putet. Maneni nisung 211 tashi TB aser HIV agi shirangba puteta liasü.

Shiranger 82% tashi taneptsü angu aser parnok teimba ka tanur aser tainlonglong purtem liasü. Nisung 1,761 tashi arishi küm 14 aser teküpokpur liasü ta Department-isa ashi.

Nisung 100 temai Pradhan Mantri TB Mukta Bharat Abhiyan kübok online platform "Nikshay" ajanga TB agi shirangertem asoshi tenlatsü tenüing züluoka lir ta Health ketdangsürtemi ashi.

Iba mapa ya President Droupadi Murmu-i September 2022 nung tenzüka liasü. Pradhan Mantri TB Mukta Bharat Abhiyan ajanga India-i 2025 tashi nung TB samatsütsü nükjidong lir.

Netanyahu-i 2026 elections nung PM atema tokteptsü sangdongogo



Jerusalem, Mongputeni/Oct. 19 (Agencies): Honibarnü Israel Ato Kilonser Benjamin Netanyahu-i pa taruba küm elections nung ato kilonser atema tokteptsü sentong ka sangdongogo.

Right-wing Channel 14 sentong ka nung Netanyahu dang ano kümsük ka atema tokteptsü asü, ta asüngdang dang pai "Hao" ta langzüa liasü. Netanyahu-i general

elections ya taküm November 3 nung agitsü aliba melen June 2026 nung agitsü sentong lir ta ashi.

Israel nunger ozüing kübok, tiri telemtetba agizükra kera election agitsü atema sorkari Knesset anenba sangdongtetsü.

Tawa The Times of Israel ajanga survey ka agiba nung Netanyahu indang Likud party yagi menden 34 akoktsü ta

ashir. Ajisüaka par opposition, taoba ato kilonser Naftali Bennett'er party tasenba yagi menden 20 dang angutsü sayu.

Hamas-i October 7, 2023 nü Israel south tsütsü amakba sülen par far-right bhukumer tem mesüzüchtsü mechi rara ya talangba kumdaktsür ta Netanyahu aija aru.

Küm tetenzüklen 'mandatory military service' dak sendakba nung ruling nung aliba ozüing yanglur temi tezüingzüktep ka yangluba sülen opposition temi parliament shibangtsü merangba nungi Netanyahu'er right-wing coalition kumzükttet.

Iba bill ya yakta election agitsü asoshi mezüingbuba mera asütsüba liasü, saka züingsem 120 aliba Knesset nung ozüing yanglur 61-i magizük aser 53-i bhukuma liasü.

Hamas-i Israel nem ano tasü mang ana agütsüogo

Jerusalem, Mongputeni/October 19 (Agencies): Ceasefire benoker aliba anema inyaksangshiba atema Hamas puri Israel aitsüba mapang iba Palestine nunger telok yagi parnoki pur aoba Israel nunger tasü mang ana meyipa agütsüogo, ta Ato Kilonser Benjamin Netanyahu indang office sangdong ka ajanga metetdaktsü.

"Israel-i Red Cross ajanga tasü mang ana agizükogo. Tasü mang ya Gaza nung Israel security forces nem agüja liasü," ta Netanyahu indang office-i Deobarnü X ajanga metetdaktsü.

PM office-i ashiba agi, asür kinungertem nem osang agütsüogo aser tasü mang ana ya maitsü jangjatsü atema Israel indang National Centre of Forensic Medicine dangi yokogo.

"Hamas puri pur aoertem meyipa anir arutsü atema inyaktepdar aser ajak anir maru tashi manentsü," ta office-isa

metetdaktsü.

Iba sülen mapang tatsüka lir Israel military-i ashiba agi, tasü mang ana rongnung kabo Ronen Tomi Engel ta jangjaogo. Arishi küm 54 tain Tomi ya Hamas puri 2023 küm October 7 nü Israel amakba mapang tepset aser pa indang tasü mang ya Gaza-i bener oa liasü.

Tasü mang tanabuba maitsü jangjatsü atema inyaktepdar, ta military-isa metetdaktsü.

Honibar aonung tasü mang ana meyipa agütsüba sülen Hamas puri tasü mang 28 nungi 12 bo meyipa agütsüogo. Ceasefire atema sensaksemba mapang Israel takhangba tongtambang kaji Hamas puri pur or alirtem ajak chioktsü mesüra meyipa agütsütsü asoshi liasü.

Tenangzüktepba nung Hamas-i ghonda 72 tsüingda asür aser taküm alirtem ajak meyipa agütsütsü nangzüktep. Iba melen Israel-ia Palestine nunger tasü mang 360 aser tepuoker 2,000 shi chioktsü nangzüktep.

Hamas-i ashiba agi, Gaza kanga mejungi raksar aliba aser Israel nunger sepaitemi Gaza nung tesem kar maneni atsünger aliba ajanga tasü mang monguteti lir.

Kasa mapang nung Hamas aser Israel napronglai ceasefire atema nangzüktepba nung aibelenba atema kati ka dak tai tongloktsütepa arudar.

Honibarnü Hamas puri Netanyahu-i aniba sorkar aija ashiba agi, parnoki yimjung atema nangzüktepba ama minyaker aser Egypt den Rafah crossing lapoktsütsü memulunger, koba tenangzüktepba nung aibelen ka lir.

Hokolbarnü Israel nunger sepaitemi Gaza City anütoklen amakba mapang tanur tenet densema kibong ka nungi nisung 11 tepseta liasü.

Kasa mapang nung Egypt nung Palestinian Embassy-i Honibarnü ashiba agi, Rafah crossing ya Hombarnü lapokshitsü.

SHEMPO KIN

UNGMA, MOKOKCHUNG TENÜNGSANG AGÜTSÜR

Kr. Lanuienla Longkumtsur, Wb. O. Tinu Longkumer aser Wt. Temsunungla Pongentsür jala, lai Master of Science, Department of Geology; Bangalore University nungi C. C Suryanarayana Rao Gold Medal jenjang ngutetba asoshi asen kin-i kanga pelaba den tenüngsang agütsür.

Anünga aliba wadang ajak nung Tsüngremi maneni temoatsü agüjangma ta asen kin sarasadem.

Kin tenüng nung ;

1. O. Tinu Longkumer, Tatar
2. Tiajungba Longkumer, Tatar
3. Limnukba Longkumer, Tatar
4. Rongsennangba Longkumer, Tatar

Afghanistan aser Pakistan nati ceasefire atema mulungtepogo

Doha, Mongputeni/October 19 (Agencies): Afghanistan aser Pakistan na arrtsü nung hopta ka raratepba sülen Qatar aser Turkiye na teyongtsüi ia rara anentsü atema sensaksem aser linük anapronglai ceasefire atema mulunga agizükogo.

Qatar indang Ministry of Foreign Affairs-i Deobarnü sangdong ka ajang ashiba agi, South Asian nung aliba linük ana yagi ceasefire benoktsü aser linük ana teti yimjung nung alitsü aser tamendakdak manokshitsü atema inyakyim ka benoktsü mulungtepogo.

Doha-isa, kidanger linük ana yagi ceasefire ya maraksadaktsüi maneni benokyonga aotsü asoshi tarutsü nunga sendentem amentsü mulungtepogo, ta metetdaktsü.

Pakistan Deputy Prime Minister aser Foreign Minister Ishaq Dar-i iba tenangzüktepba yangluba ya pelashishia agizükogo aser ashiba agi, iba ya lenmang shitaki aotsü atema mezüingbuba jenjang agiba lir. "Qatar aser Turkiye nati tongtambang shilem agiba atema kanga pelar," ta pai X nung post ka ajanga metetdaktsü.

"Afghanistan nungi Kiralongrartemi Pakistan

minprongba ken o bentettsü atema Turkiye nung taruba senden amenba mapang ken o asadanga alitsü atema inyakyim tejangja ka amenoktsü yongya atar," ta pai shisem.

"Taküm samaba nokdangtsü atema takokba tashi inyakttsü kanga tongtambang," ta Dar-i ashi.

Taoba mapang linük anapronglai parnok Honibarnü Doha nung yimjung atema sensaksemtsü ta shir liasü. Taliban-i 2021 küm sorkar atsüingba sülen linük ana tsüingda tang tamajungtiba raraogo.

Islamabad-i Kabul dang par litsü nungi inyaksangshiba kiralongrartem azioktsü atema takhangba agütsüba sülen linük ana tsüingda rara tenzüka liasü. Pakistan-i ashiba agi, Afghanistan-i item telungpurtem nem par litsü nung tejenokdak agütsür.

Kasa mapang nung Afghanistan-ia, Pakistan amaktsü atema telungpurtem nem parnoki tejenokdak magütsü ta ashiba den osang tai prokshiba atema aser ISIL (ISIS) den sendaktepa aliba telungpurtem nem tejenokdak agütsüba asoshi Pakistan aitsüogo.

Sorkari ni aputsü meranger: KP Sharma Oli



Kathmandu, Mongputeni/Oct. 19 (TYO): Nepal indang taoba ato kilonser KP Sharma Oli-i Deobarnü ashiba agi, tang aliba caretaker sorkari kuli tejangja makai pa aputsü meranger. Paisa, pa mapa nungi anentsüsa Gen Z temi longkak

aitba ajanga lokti nung tetsübo adokdaktsü, ta ashi.

Nepal ato kilonser menden nungi atsüingdoker mezüingbuba media den Kathmandu nung jembidang, par CPN-UML party ajanga tang shibanger aliba House of Representatives

tanaben benoktsü merangtsü, ta Oli-i ashi.

Interim Prime Minister Sushila Karki kübok sorkar ya "unconstitutional manner" nung tentet aser taruba küm March ita agitsü aliba general election atema süoki ia mebilemer, ta pai ashi.

Nepal nung Gen Z lanurtemi anir ochimashi mapa inyakba aser social media nokdangba mechi pa mapa nungi anentsü khanga longkak aitba ajanga Oli ya September ita tetenzüklen ato kilonser menden nungi alua liasü. Iba longkak aitba ya linük yimtiba tesem kar nung azüdokshia akum aser security forces temi nisung jenti apu.

Longkak aitba mapang Baluwatar nung Ato Kilonser aliba kidang pa dak tera agi teka

mesangshi aser Nepal Army temi ang kumzüktsüsa akum, ta taoba ato kilonseri ashi. Pa indang mobile phone anogo ishika rakzüka ayu aser timtem liaka pa indang security personnel tem kar anizüker ao ta ashi.

Gen Z longkak aitba ya shilem kar "external elements" ajanga lir ta Oli-i ashi aser longkak aitba mapang ki o jen raksatsüba indang osang mabenba atema media aitsü. Prime Minister's Office, Parliament aser Supreme Court densema sorkar indang tongtipang ki o jen aika raksatsü saka osangbeneri item ya senzüka yutsü, ta ashi.

Paisa lanur temi aniba "Nepo-kids" campaign aitsü, koba ajanga tashi tait yimten yimsüsür aser ketdangsür

indang tanurtemi pei tsürabor temi ochimashi mapa inyaka bendenba rongsen nung alir ta tai tonglokja liasü.

"Gen Z lanurtemi Nepo-babe campaign tenzüka nung magizükttet, koba ajanga Nepal nunger nüburtem rongnung tetsübo aйдaktsü," ta Oli-i ashi.

Kinük balala nungi ajungshiaka Oli ya party indang chairman menden yutsütsü memulung, saka danga lenirtembo longkak aitba sülen mapa nungi anen.

"Nüburtemi kü nem vote agütsüra ni yimsüsüba mendeni meyipa shilangtsü. Linük aser ozü party-i tanga ni nüingdaker," ta pai osangbener dang ashi.

"Linük aser nübur asoshi mapa tajung inyakttsü tang tashi küdak tashi lir."

4buba Patkai Badminton Open Tournament 2025 asayaogo



Dimapur, Mongputeni/October 19 (TYO): Patkai Badminton Club (PBC), Patkai Christian College (Autonomous)-i ayongzüka 4buba Patkai Badminton Open Tournament 2025, October 17 nungi 18 tashi Dr. H. Ibotombi Singh Patkai Indoor Stadium nung asayaogo.

Asayamung nung tetsür kija asaya Iciheile Hieme-i akok aser Heriale tanabuba jenjang nung liasü. Tetsür tarep asaya ya Iciheile Hieme aser Shangyaola Jajo nati akok aser Heriale o Isizeule na runners-up liasü.

Tebur kija asaya Thejalelhuo Kense-i akok aser Ngailak Julian Newme tanabuba jenjang nung liasü. Maneni tebur tarep asaya ya Thanchuimi Rungsung aser Thejalelhuo Kense nati akok aser Rokosito Khro o David

Rungsung na runners-up liasü. Iba asayamung ya October 17 nü Associate Professor, Department of Livestock Production and Management, Nagaland University, Medziphema Campus Dr. N. Savino-i officially lapoktsü, shiba iba asayamung lapokba sentong nung tetushi tejaoker liasü.

Sentong nung o jembiba mapang Dr. Savino-i, asayamung nung shilem agirtem dang takok tashi tashi tajungtiba asayatsü merangtsü ayongzü. Football asayar ka ama pa tajangshiba indang jembiba mapang pai, asaya nung teamwork aser sportsmanship koda tongtibang iba indanga lemsatepa liasü. Maneni pai asayartem ajungmesoa ajak takoker kaka lir ta ashi, aser parnok dang asayaba tesem telung aser

tema nung temaba jenjang tongtettsü atema maneni meranga inyaksü ajungshi.

Asayamung lapokba sentong nung PCB tir Kevissekuo Sechü-i lokti pela agizükba o jembi aser pai club inyakyim indang metetdaksü. Asayamung lapokba sentong nungsa Margaret Shishak School of Music, Patkai Christian College (Autonomous), nung fourth-year kaketshir Achantnis Dichongta-i musical performance ka agüja liasü.

October 18 nü asayamung nung takokertem sangdongba sülen Khrieketu Kuotsu-i, asayartem terenlok asoshi tangzükba balala agütsü. Paisa, asayaba mapang tashi kümzüka ayutsüba tasa aser tarutsü nung asayatem atema renemtsü asoshi tangazükba balala agüja liasü.

INDvsAUS: Australia-i wicket 7 agi mezüngbuba ODI kokogo

Mongputeni/October 19, 2025 (Agencies): Deobarnü India aser Australia na mezüngbuba ODI asaya Australia-i wicket tenet agi kokogo. Tzünglu aruba ajanga iba asaya ya minpronga liasü. Ita aika sülen Virat Kohli aser Rohit Sharma nata iba asaya nung shilem agi saka junga masayatet.

Mezüng batting amenba sülen India team-i asayar 9 out sür run 136 dang yanglua liasü. Tzünglu agi minprongba ajanga asaya ya over 26 dang kümtsü. DLS benokba sülen Australia asoshi asaya akoktsü atema run 131 yanglutsü nüngdaka liasü, koba parnok over 21.1 nung menepa asaya kokogo.

Australia team batting amenba mapang Travis Head kanga kara out süatok aser Matthew Short-ia teyari balaka magütsü out asü.

Ajisüaka captain Mitchell Marsh-i out mesüi ball 52 nung run 46 yanglua team ani aser Josh Philippe-ia ball 29 nung run 37 yanglua teyari agütsüogo.

India nunger bowler Arshdeep, Mohammad Siraj, aser Harshit Rana nungeri ball junga montet aser parnoki Australia nunger batter tem nem run yanglutsü atema maongka aika agüja liasü.

India nunger batting amenba mapang tzünglu agi aiben minprong asü aser iba den Australia nunger bowler temi ball kanga junga ona parnok nem timtem agütsü. India nunger rongnungi KL Rahul-i ball 30 nung run 38 yanglua pai tajungba asaya liasü.

Rohit Sharma, shiba India tenüng nungi asaya 500buba nung asaya liasü, pa captain Shubman Gill den opener liasü, saka pai ball 14 nung run 8 dang

yanglutet. Iba sülen Virat Kohli batting ameni ait saka pai ball ti nung run ka danga meyanglui out süatok.

Maneni Captain Gill aser Shreyas Iyer napronglai imlaba ama junga masayateti Nathan Ellis aser Hazlewood nati out süja liasü.

Ajisüaka Axar Patel aser Rahul na senteper run 39 yanglua team nem timla tera agütsü saka Axar (31) spinner Matthew Kuhnemann-i out süja liasü. Iba sülen Rahul aser Washington Sundar nati ano run 30 yanglu.

Asaya nung Australia nunger bowler temi pitch condition kanga junga amshia asaya aser kasa mapang nung India nunger batter temia junga masayateti laisü. India aser Australia na tanungba ODI asaya ana ya Adelaide aser Sydney na nung asayatsü.

World Junior Championship: Tanvi Sharma-i silver angu



Mongputeni/October 19, 2025 (Agencies): Deobarnü Guwahati nung BWF World Junior Championships nung India tsür Tanvi Sharma-i final nung Thailand tsür Anyapat Phichitpreechasak straight games nung mekoki silver medal dang nguteta liasü.

Arishi küm 16 tain India tsür la yagi final nung Thailand tsür la ya 7-15, 12-15 agi makok. 2008 küm Saina Nehwal-i iba asayamung nung gold anguba sülen küm 17 lir tang lai mezüngbuba medal ngutetogo.

Nehwal aser Aparna Popat na sülen iba asayamung final tonga asayaba asayartem rongnung Tanvi ya tasembuba asayar dang lir. Nehwal-i 2008 küm gold aser 2006 küm silver medal angu aser Popat-ia 1996 küm silver ngua liasü.

Semifinal asaya nungbo Tanvi-i 15-11, 15-9 agi straight games nung China tsür Liu Si Ya koka liasü.

World Junior number one asayar ya India nunger Junior asayartem rongnung iba asayamung ka nung medal ka dak tema anguba mezüngbuba asayar kümogo. Lai India team den mixed team event nung bronze medal angu aser tang

kija asaya nunga silver medal nguogo.

Final asaya ya asayar anapronglai kasasa dang asayateta tenzüka score ya 2-2 aser 4-4 ya asayayonga atu.

Iba sülen Phichitpreechasak-i kanga sangra asayaba ajanga Tanvi asaya raksatsü aser la 10-5 agi tejakdang aküm.

Smash tesashi ana maoktsüba den Tanvi-i shot ka junga judge mesütetba sülen Phichitpreechasak-i mezüngbuba game ya akok.

Tanabuba game ya Tanvi-i kanga junga asaya tenzü. Iba sülen Tanvi-i shot ka junga judge mesütetba sülen Phichitpreechasak-i mezüngbuba game ya akok.

Ajisüaka break tashi nunga Tanvi 8-5 agi tejakdang liasü, saka iba sülen Phichitpreechasak-i tajungba asaya tenzü aser Tanvi nem aibelen menadakja liasü.

11-8 agi Phichitpreechasak tejakdang akümba sülen lai asaya amokbanger asaya liasü. Tanvi-ia meranga asayadang saka 9-13 aliba mapang lai ano aibelen mena liasü. Iba sülen Phichitpreechasak-i aibelen mesüi point ana nguteta lai final asaya koka gold medal ngua liasü.

INDIA OSANG :

Tapak 3 nungi...

Diya aser candle nung sen...

Vishva Hindu Parishad (VHP) national otongdar, Vinod Bansal-ia, Yadav-i India nunger sobaliba masü bendanger sobaliba tenüng asanger, ta ashi.

Bansal-i, "UP nung taoba mapang Chief Minister-i Diwali benjung mapang nung Khristmas tenüng asanger. Diya jenti tsüklokba agi pa melung raksaa Hindu nunger billion 1 dang diyas aser candle nung sen teindok, Khristmas nungi angazükang ta ashir. Pei sasa Yadav ta

jembir kati Hindu nunger dang nungibo Khristantem taliba meimer asütsüa akok," ta ashi.

"Khristan yimsü maliba mapang nung Diwali benjungbo monga liasü. Tanübo Diwali benjung mapang pai Khristmas indang tesayuba agütsür. Khristmas yabo ita ana sülen ang ajurutsü. Tang kechi benjung amongerar pai memetet. Ayodhya sangwaba aser Hindu nunger pelaba atema pai tenük meremba ya tim masü," ta paisa shisem.



Nagaland Sepaktakraw senior team October 23 nungi 27 tashi 35buba Senior National Sepaktakraw Championship nung asayatsü. Iba asayamung ya Manohar Parrikar indoor stadium, Madgaon Goa nung asayatsü. Team ya Holshe Khrieo aser Miss Puleno Neikha nati anir aotsü.

BILEMDANGANG

"Memetetba dang nungibo tiyazü metetbaji lendong tulutiba."